

## 2 Jon

# A Fataraguaiana Lagasai Si Jon

### A Ferawaian Paamua

Lana lagasai aanabe' a saxa mataa aava xali nane xa pana matalava (naak na Jon, a Yaamut si Yesus), i taxa faxaar a saxano rabuna aava ri namkai o ri taa fevubuxan xasingit nari e ri taa faxatang sena rabuna ina fepitaa bit. Nane lisan a lagasai aanabe' xe sina saxa tefin e a rafulak sina; maam lamon o a malasuf ina fasisian aanabe' a malaan: a tefin aave a malaan sena saxa faxuvulan ina rabuna aava ri namkai e a maana rafulak sina ri malaan sena mu rabuna aava ri waan lana faxuvulan aave.

---

<sup>1</sup>Nenia, ne matalava e ne kala xe siim, tefin aava Piran fo siak fati nano e mu rafulak siim. Nenia, ne vubuxan xasingit nami xapiak lana vilaana ina tuunayan. E pife nenia sang mon, a maana mu rabuna aava ri texaas sena vilaana ina tuunayan, nari sait ri vubuxan xasingit nami. <sup>2</sup>Senasou? Senaso a vilaana ina tuunayan fo vao netaara e i taa waan xulutaara vulai.

<sup>3</sup>Ne nung a Piran Tamataara narie Natuna, na Yesus Krai o re taa fafaamamaas netaara pana xakaavangan xatam e mamaaluxan sire e pana luaian. Tuuna a vubuxan xasingitan sire taxa waan xulutaara.

<sup>4</sup>Ne faamamaas paaliu senaso ne fo langai o saxano rafulak siim ri taxa sangas fatak lana tuunayan malaan se Piran Tamataara fo fapiti netaara pana. <sup>5</sup>E naboxo ne taa pife kala xena fatexaas nano pana lagasai fa'ui, piau. Taasaxa rao ne falamon fa'uli nano pana saxa vuputkai aava waan ti la tangpat. A vuputkai malaanabe': taara taa vubuxan xasingit a maana rabuna saxa saxa. <sup>6</sup>E a vubuxanan aave a malaan, taara taa usi fatak a ferawaian sina Piran. E nami, mi texaas o a ferawaian ti la tangpat a malaan: taara taa taagul pana vilaana ina vubuxan xasingitan.

<sup>7</sup>A mu rabuna ina bitan aava ri pife kuus o na Yesus fo mataa xo, ri taxa sangas xolai la xavala. Nari aave, ri mu xaiyaas si Krai e ri taxa lo bit. <sup>8</sup>Faxatang nami xaseri. Pife roxo a faisok sitaara i taa mo palau e mi

taa pife siak a sepirigus simi. Taagul fatak talo mi taa siak a sepirigus xapiak. <sup>9</sup>A mataa aava i taa pife waan lapaana fepitaian si Kraiſ taasaxa i taa tafang xasliuane, nane taa milung sena salan sina Piran. Nase' ta mataa taxa taagul fatak lapaana fepitaian si Kraiſ, nane sina Piran narie Natuna. <sup>10</sup>Tamo a mataa taa savat simi pana fepitaian patak, muta irimai xuvul pana la lifu simi. Muta fasusuie. <sup>11</sup>Senasou? Talo mi taa pife xavange pana vilaana saat sina.

<sup>12</sup>Ne toxan a mo xaves xena xuus fatexaas nami pana taasaxa ne bai kala xe simi pana naboxo. Rao ne taa savat xe simi e taara taa irimai e a faamamaasan simi i taa molava piis.

<sup>13</sup>A mu rafulak si tiam, a xasa tefin aava Piran fo siak fatie, ri fasisi nami.